

四庫全書

集部

欽定四庫全書

集部

穀城山館集

目錄
卷一

詳校官中書

臣沈鳳輝

侍讀

臣孫球覆勘

總校官中書

臣朱鈐

校對官中書

臣吳裕德

謄錄監生

臣徐彩

欽定四庫全書

集部六

穀城山館詩集

別集類五

明

提要

臣等謹案穀城山館詩集二十卷明于慎行撰慎行有讀史漫錄已著錄慎行於李攀龍為鄉人而不沿歷城之學其論古樂府曰唐人不知古樂府是知古樂府也不效其體而時假其名以達所欲言近世一二名家至乃

逐句形模以追遺響則唐人所吐棄矣其論
五言古詩曰魏晉之于五言豈非神化學之
則迂矣何者意象空洞樸而不敢瑣軌塗整
嚴制而不敢駛少則難變多則易窮若原本
性靈極命物態洪纖明滅畢竟精蘊唐詎無
五言古詩哉其生平宗旨可以槩見然其詩
典雅和平自饒清韻又不似竟陵公安之學
務反前規橫開旁徑逞聰明而徇古法其矯

枉而不過直抑尤難也乾隆四十三年六月

恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

集部六

穀城山館集目錄

別集類五

明

卷一

古樂府

卷二

五言古詩

卷三

五言古詩

卷四

七言古詩

卷五

七言古詩

卷六

五言律詩

卷七

五言律詩

卷八

五言律詩

卷九

五言律詩

卷十

五言律詩

卷十一

七言律詩

卷十二

七言律詩

卷十三

七言律詩

卷十四

七言律詩

卷十五

七言律詩

卷十六

七言律詩

卷十七

五言長律

卷十八

七言絕句

卷十九

七言長律

六言絕句

五言絕句

卷二十

賦

欽定四庫全書

穀城山館集卷一

明 于慎行 撰

古樂府

本調

叙曰唐人不為古樂府是知古樂府也辭聲相雜既無從辨音節未會又難於歌故不為爾然不効其體而時假其名以達所欲出斯慕古而托焉者乎近世一二名家至乃逐句形模以追遺響則唐人所吐棄

矣余嘗為郊廟饒歌可數十首已而視之頗涉兒戲
亦復不自了然遂焚棄之取其音節稍近者倣其一
二謂之本調至近體歌行如唐人所假者各從其類
附焉而不曰樂府則詩之而已矣夫唐人能為而不
為今之君子能為而遂為之予奈何不能為而為也
管城遊行聊以自娛豈稱述作哉

遊仙詩

姑射一何高高高高凌絳闕上有兩仙人肌膚如玉雪不

笑亦不言貌與世人絕

解一

上謁逢真人授我大藥訣服

藥一玉箱遼然五情熱輕舉步九霄烟雲忽若滅

解二

鳥止城門安知是令威徐市入東海胡不采藥歸三山

空波濤孰別是與非

解三

大化自有運壽命各有期追念

古賢聖往往為土灰汗漫不足道六籍我所歸

解四

長歌行

宴坐北堂上秋宇何清涼客心殊不樂起視夜未央
新月墜空軒列宿爛成行熠燿飛中庭莎雞號東廂仰見

孤鳴鴈噉噉天南翔
屣屣步階除嘯咤以慨慷
少壯弄文史思登君子堂
青陽忽不待玄髮亦已蒼
百川正東流大海何泱泱
寒暑相遷次日月互匿藏
年命非金石榮耀安得長
自非不朽圖何以播餘芳
抱茲千歲憂俯仰中情傷

短歌行

對酒當歌朱顏未酡
日月其除不樂奈何
解一周道茫茫
辟如羊腸
葆身藏名
唯有醉鄉
解二陰木貞心
烈士苦顏

微子之故胡為永嘆

三解

海水知寒山石知雨憂來攻中

誰當告語

四解

河之悠悠欲濟無梁率彼曠野霜露沾裳

五解

斲桂為橈葺蘭為宇美人不來吾誰與處

六解

鰕鰕篇

醢雞慕鼎俎不知天地寬
蜉蝣望朝夕安能念歲寒
小人固多逸志士良不閒
遠涉四海岸高舉五嶽巔
俯視紅顏子磬折一何艱
春華誠可悅秋實無乃闌
嘯咤擁長劍氣薄曾雲端
品庶徒營營安知達者觀

飲馬長城窟行

青青陵上栢翹翹思遠客遠客在何方
長城道路長路長時復久門外春楊柳
楊柳正依依君行胡不歸食鹽自知
辛食藥自知苦苦辛在人心當復誰為
語有鳥雲中來嗷嗷過我庭願附一札
書達我沈憂情鳥辭天路遠哀鳴去不
返去去莫復陳親疎自有因

善哉行

秋風蕭蕭白露為霜今日相歡胡不盡觴

一解

遊彼三山

絳闕煌煌道逢安期授我要方二采苓采苓于彼高岡

日暮天寒風吹我裳

解三

羣鳥夜鳴虎豹縱橫躊躇四顧

鬱何芒芒

解四

白鵠晨號在彼中阿嘯匹不得傷如之何

解五

東方漸高明星沒河母復相思沉吟嘯歌

解六

相逢行

相彼雙闕間車馬夜行遊相逢問君家君家南陌頭黃金為門樞碧玉疏高樓中庭垂珠樹靈鳥翔庭陬長子侍中郎中子大長秋小子勝揖拜賜爵闕內侯五日一

洗沐賓客滿道周通名不敢進雨汗交橫流置酒高堂
上歌舞無時休越姬調鳴瑟趙女彈箏篴一酌山嶽壽
再酌江海酬行樂未及終年歲忽已邁日匿西崦崕月
出咸池隅日月有虧盈榮華能久留所以古賢聖視若
烟雲浮

燕歌行七解

西風烈烈霜滿庭天寒波深列宿明孤堂四壁絡緯鳴
念君遠客憂思盈日月相逐逝不停百川東下如建瓴

陌上桑

日出東南隅照我邯鄲宮邯鄲有好女顏色靡春風采
繁出城南采桑出城東黃金為長鉤桂枝為大籠上襦
繡鴛鴦下裙繡芙蓉肌膚宛如玉善態不可窮飛鳥見
女來厲翮凌高空游魚見女來潛遊深淵中車人去其
蓋舟人去其蓬少年滿路傍嘆息忘所從

西門行

出西門歌且行今我不極樂當欲何營

一解江河水東下

如建瓴安能邑邑迫感坐使華歲零二解策駿馬駕高軒

召呼平生遊馳逐雙闕間三解薰以香自燒膏以明自煎

鼎鼎百年內胡為長不歡四解誰見仙人安期生驂駕白

鹿遊三山誰見仙人安期生驂駕白鹿遊三山五解四時

相遞代日月如轉丸乘時修令名毋為世所嘆六解

艷歌何嘗行

何為侘傺長吁但當飲旨酒吹笙竽一解二十為侍中郎

三十執金吾二解四十雖不大貴車馬駸駸往來公卿長

者居

三解

但當在五陵陌上快獨呼雞走狗被服襜褕

四解

男兒墮地橫絕四海皇皇日夜心一何愚

五解

疇昔相追

隨斗酒從遊盤一日不相及中道與君成間闊束髮奉

明主忠誠夙所殫上有公家三尺下為衆庶所觀彼美

人子何為營營日夜誠足嘆

疇昔以下為趨

門有車馬客行

門有車馬客駕言出漢闕顧念平生遊枉迹問考槃倒屣出門迎攝袂不及飡坐客置斗酒握手論辛酸借問

朝市中榮枯多變遷金張自赫奕丁傅相扳援新貴日
更進舊老日以殘淺水有迅波浮雲無定端天時相代
謝世事誠艱難送客閉我門偃仰竊自歡

白頭吟

朝為山上雲暮為川上雨變化在君心然疑不得語一

解

今日為牛女明日為參商參商不相待安知秋夜長二

解

素心一何愚自謂與衆殊所賤管與蒯所貴玉與珠三

解

白石何粲粲流水何潺潺水流石不轉人情中道還四

解

滿歌行

適意能幾何日月不居逝如江河乘回路岐自使蹉跎

遙望舊鄉鬱鬱何嗟哉心之煩憂其端孔多

解一

炯炯多所

念鼎鼎欲何為舉世如馳拙者守道智者趨時上觀下

獲以博銖錙豈不洵美匪伊所思

解二

秋風既寒昔蹈東

海一何盤桓流水出門白雲在山風塵撓予去不遑安

夙夜在公凋此華顏

解三

天道難知人胡可謀遺榮避世

師彼莊周鑿坏踰垣亦復何求楚楚貴人不知春秋

解四

斗酒相呼以遊以遨豈伊異人夙昔同袍莫小泰山莫
大秋毫直木先伐薰香自燒爾不自夷歲月其惱葆真
繕性含光自韜存神觀化晞彼松喬

斗酒以
下為趨

瑩篴引

今日斗酒會為歡誠未央高堂羅尊俎四座何清涼庖
人出珍膳嘉旨充圓方吳歆中酒發趙瑟激清商絲竹
洞心耳悲至不盡觴為客起行遊遊彼大道旁車馬若
流水佩劍寒秋霜被服心所喜聊且為樂康朱門多媚

少磬折有容光春華耀朝日夕暮從風揚四時舍我逝
日月遞相藏人生天壤內譬鳥集枯桑何不適情恣
君技所長含情欲何待但為達者傷

獨漉篇

獨漉獨漉山深水曲水曲回橈山深折軸黃鵠高飛橫
絕四極欲往從之恨無羽翼轉蓬離根隨風飛翻遊子
不歸幅此華年騏驥不駕誰別逸足璞石不分誰知良
玉利劍在掌可以割犀全身忘國安用臣為龍欲上天

勢須浮雲豈無蹇修不可以羣

淮南王

淮南王慕靈仙服食丹藥求大年重樓十二羅五城玉
童吹簫作鳳鳴左石室右丹臺枕中鴻寶不可開咸陽
帝子非仙才八公一去神鼎空化為雙白鶴飛雲中飛
雲中遊天際雞犬無聲空城閉茂陵神宮樹成列淮南
丹竈狐兔穴

驅車上東門行

驅車上東門回望咸陽路鬱鬱五陵間纍纍多墟墓長
夜號鼙鼙秋風走狐兔牧豎遊且歌行人四面顧借問
此何誰昔時董與傅車馬如流水第宅通雲霧富貴一
旦空忽如草間露閱水日成川閱世人非故賢愚共一
丘千載為旦暮嗟彼道傍子營營胡不寤

公無渡河

公無渡河河水湯湯連山嵯峨雷雨晦冥龍伯來過吞
舟鋸齒其族孔多公無鳬躍之技出沒濤波又無寶璧

與馬歆神之和往則沉溺當奈公何善遊固有數請公
無渡河

君子有所思行

登彼西山道還顧重城闕皇居麗以佳侯王多閼閼國
典盛衣冠軍容陳斧鉞雞鳴內殿朝日宴賓徒謁楚舞
奏方闌齊謳聲未歇允茲七貴里執手忱可熱四郊既
多壘九土災孔烈肉食何委蛇憂時在巖穴肯哉周任
規陳力乃就列

董逃行

西風木落天秋江寒露下霜流三星素月當樓芳筵嘉
客娛遊促觴接鄰淹留有核充溢壺觴吳趨越艷登堂
皎如星文電光丹脣素齒流芳歌聲上薄楣梁瑤笙象
管中微七盤竒舞何遲腕弱不任銖衣僊僊舉手欲飛
四座太息忘疲三清旨酒既醺都梁沉水氤氲騰觚猷
壽欣欣賓心既醉如焚意氣激薄青雲日月不居歲闌
世道嶮巇萬端春華坐失渥丹何不被服羅紉逍遙永

夕為歡

仙人篇

我聞列仙人高舉雲中行
遊目陬四海矯首跂太清
翔鸞翊芝蓋白鹿驂華輶
朝發玄都府夕憩蓬萊城
高風吹玉軼儵忽遂上征
九關敞朱戶雙闕鬱崢嶸
雲漢流前除白榆夾道生
羨門與赤松含笑窺軒楹
飲我玄霜液飡我琪樹英
回觀八紘內萬有如蟻螻
跳丸一何迅過駒逝不停
大年等天地末路安足營

結客少年場行

少年慕豪俠，意氣凌高空。
生長五都市，結交六郡雄。
千金買紫鷺，萬戶買吳鴻。
探丸渭城北，挾彈霸陵東。
盃酒笑相許，忼慨氣填胸。
恥為小夫態，長慕國士風。
連營過細柳，逐寇出回中。
左擊呼韓遁，右戰谷蠡窮。
塵起塞雲黑，日落秋原紅。
韜戈報明主，長揖不論功。

白紵舞歌晉體

蘭膏明燭秋夜長，齊謳秦吹響洞房。
二八徐舞為仙倡。

紉袖拂面飛朝霜遊龍宛轉雙鴈行如卻復進低且昂
朱脣妙響含宮商凝嬌流態不可詳絃悲管急欲斷腸
人生百年如電光春華未落秋風涼盤中美酒琥珀香
鳳腊麟脯充圓方君今胡為不盡觴生逢聖世樂且康
白紵辭鮑照體

雕軒洞戶組帳懸垂璫結佩舞少年凝眸欲笑卻復前
鳴絃激管流芳烟驚鴻乍散白鵠旋如矜若怨姿變遷
低鬟拂袖私嫣然

月橫星高四壁寒秦箏激響趙瑟彈滿堂霜雪飛羅紈
含宮咀徵曲未闌杳然流目意楚酸春華委謝秋露溥
君今不采誰為歡

張曲筵陳芳醕月下妖童白紵舞絃悲管促雙袖舉桃
花水邊三月雨吳宮烏啼明星微西風拂幌木葉飛堂
上燭滅君寧歸

枯魚過河泣

福集豈無端禍臻亮有由枯魚過河泣悔從鯨鰐遊揚

鬻出滇海振翼徙炎洲翻濤作風雨噴浪成山丘旁顧
無陵鯉鱸安足儔一朝宕海滢潮落委遐陬紅肌試
礪斧白骨聚虬蜉橫海既成觀盈尺亦滿舟回首羨魴
鱖游戲清波流慎旃遠遊子濡足何所求

門有萬里客

翩翩紫騮馬宛宛黃金璫客從何方來悲吟坐我堂

解一

客從江上來言向長安路海水白波長茫茫不可渡

解二

我有綠綺琴為君鼓三行誰為膠與漆誰為參與商

解三

索索復索索送子長安陌借問雲間人何如山中客

四解

山中無所贈手把青蘭枝一握何足道但感同心辭

五解

別君日以深送君日以遠安危在盛名努力加餐飯

六解

江上曲

天津橋下楊花白春風吹落東城陌城烏啼罷燕燕飛
飄霜流雪何罪微畫堂窈窕連香閣金屋春寒珠網薄
芙蓉羽帳粉色香萬年枝上初日長可憐風吹過江去
相思望斷江南樹

陽春曲

綺疏旭日春風寒風吹落花飄井欄飛來飛去玉柱端
美人掩鏡鳴雙環雕琴纖指當窗彈含宮咀商曲欲彈
遼然流想心不歡天山積雪久未乾尺書欲寄隴道難
安能隨風到玉關閨陰早霜歲欲闌紅顏寂寞空長嘆

子夜歌十二首

儂年三五時雙鬟垂兩肩日在歡左右不解取歡憐
秋月照四壁絳緯當窗織徒聞機杼聲終夜不成匹

不能識郎心何用識郎面黃蘗在深林苦心誰得見
始欲識歡時願作同心結絲綫不相逢裏許暗自別
歡游橫塘岸儂望長安道昔為同心花今成斷腸草
年少不為樂夷猶欲誰與不見東門花落地如紅雨
明旦溝水頭折柳牽郎衣郎心如流水東去何時歸
誰令冰不寒誰令火不熱雨霜塗前除儂思底得絕
枕上看月來夢中與歡訣月自不相離歡心不如月
相逢不須與相看長脉脉木末采芙蓉蓮子何由得

儂如水中石波至亦纍纍歡如陌上塵左右從風吹
玉腕弄柔絃清商吐未轉何意涼風吹使我肝腸斷

子夜春歌

朱景帶碧樓新風吹羅幌誰能懷春情不發柔絃響
春花渾欲笑春鳥自成歌惆悵春半上含愁可奈何
金屋燕初飛長堤草已綠春蠶不作繭思子何由續
正及春花時采芳步華薄春風復無情又欲吹花落

子夜夏歌

開軒待遠風風來不吹面何如覓剪刀裁作合歡扇
何處復無暑月出湖水邊汎舟芙蓉裏分明自取蓮
含桃初作花畏恐旁人見今日食含桃空條誰復盼
別時楊花落別後藕花芳惜往覺日短望來覺日長

子夜秋歌

嚴霜下空階促織聲何烈夜中無人語懷情望秋月
涼風夜中來白露凝如玉不敢拭清砧擣衣亂心曲
露井凍銀牀秋風生桐樹任吹桐花飛莫吹梧子去

別歡三春月思歡九秋霜霜華上玄鬢儂心底不傷

子夜冬歌

朔風吹北林玄冰結遠岸君心非松栢歲寒那不變
萬里覆寒雲千林飛素雪此時為歡愁心如三伏熱
華茵倚重爐璇房捲羅幕驚見雪花飛謂是楊花落
憶歡不能寐中夜涕縱橫河流不應凍是儂淚結成

上聲

木葉自欲黃不待西風作聞郎歌上聲曲終淚已落

上聲一何悲柱促絃欲絕三嘆未終極已看鬢如雪

前溪

郎從前溪去不向前溪返水流無淺深人心有近遠
前溪何潺潺花流逐水去儂欲使花還不能使水住

七日夜女歌

長空起薄寒明河流素月誰云一夕歡可當經年別
經年一水間相望不相及莫卷七襄衣是儂愁思織

碧玉歌

碧玉好顏色故是小家女笑倚金繡屏不解挑郎語
碧玉十五餘絲髮不及肩理妝背面立宛轉得郎憐

續曲歌

別時不知愁別後空相憶日晚潮水來渡頭問消息
儂作博山爐雙烟吐不住郎如飄風吹但將香引去
本作雙鴛鴦忽為別鵲怨不是儂淚流江水有時斷
脈脈閨閣中常似千里別兩心自分明有如水上月

東飛伯勞歌

鴛鴦比翼翡翠吟巫山湘水高且深可憐新妝映白日
芳脂艷粉當軒出銀牀試展金縷衣綺疏月綴琉璃扉
凝嬌聚態語復咽卷衣謝君心欲絕春風裊裊花氣寒
長留可憐誰為歡

烏棲曲四首

桃花如泥柳如雪飄泊乘風無斷絕青楓江上波色寒
郎今不渡春夢闌

白門樓烏夜未曉參橫月沒霜皎皎金徒受水能幾何

合歡日少別日多

芙蓉羽帳翡翠鉤
月華當戶河漢流
微吟細酌歡未厭
城上烏啼明星爛

銀牀小簟雲母屏
博山吐焰雙烟青
相看脈脈兩無語
曼聲一曲淚如雨

江南曲

金堤柳枝拂水黃
桃花如焚衆草香
江南稚女歌春陽
歌春陽氣若蘭采
江離遺所歡

春江漠漠朝氣深丹霞紫露流滿林
踟躕解佩傷春心
傷春心騁遠目望平臯草空綠

四時折楊柳歌

春風入上蘭鳥啼綠烟中日耀桃李顏
折楊柳春去復
來歸人去當歸否

芙蓉散朱華吐艷為誰芳不采當奈何
折楊柳不畏秋
浦空願得在歡手

問君何時歸明月凝前除微霜下沾衣
折楊柳擣衣寄

遠人夜涼不覺久

北風正烈烈雨雪逐風飛
山深步道絕折楊柳但保歲
寒心不道歡相負

穀城山館集卷一

欽定四庫全書

穀城山館集卷二

明 于慎行 撰

五言古詩

叙曰余為五言古風好學魏晉非其所質也夫魏晉之於五言豈非神化學之則迂矣何者意象空洞樸而不敢凋塗整嚴制而不敢騁少則難變多則易窮古所謂鸚鵡語不過數聲爾原本性靈極命物態洪

纖明滅畢究精韞唐果無五言古哉余既知其解矣
而不能舍魏晉者取其可以藏拙且適所便非能遂
似之也海內賞真之士有以吾言為是者詩雖不視
可矣

感懷二十首

皎皎天中月照我虛堂壁撫枕心不爽起視今何夕攝
提指孟陬年歲忽復易跳丸日夜馳迫迫將焉適烈士
懷貞心夸毘營寸尺因時覽羣動感嘆無終極

皚皚原上霜萋萋道傍草金石有銷鑠人生安可保大
化為鑪錘萬物何繖繞達士恥近圖所思在遠道榮瘁
非有期修名苦不早焉能自結束坐向風塵老

日出上東門桃李何灼灼回風中夜起嘉樹紛其落昔
時五侯子寶馬黃金絡北里吹笙竽南隣鐘磬作鬪雞
出長楊挾彈過平樂光采照雲日意氣何軒霍高臺一旦
平里巷飄飛霍不見東陵瓜近在青門郭

迢迢泰山隅渺渺無行迹猿鳥夾路啼松桂百餘尺中

有嘯歌士鳴琴卧泉石夕采山上薇朝吸松間液放情
凌絳霄流目矚四極宴息藐無言中情多所適我欲往
從之惜哉無羽翼

薛公昔好士珠履羅高堂酒酣指白日各欲吐肝腸相
印甫脫肘門前跡已荒魏其盛賓客田侯安敢望一綰
大將組車馬盈路傍疎者為膠漆親者為參商朝暮市
門改貴賤交情傷灌夫與馮子意氣何飛揚悠悠數千
載此道久淪亡

朔風淒以厲，慘慄吹人衣。
玄雲起大陸，雨雪何霏霏。
孤鴻號中夜，百卉具已腓。
長恐堅冰至，凜凜傷骨肌。
雞鳴感時物，游子駕言歸。

白日回青陽，春草萋已綠。
游子忽不樂，沉吟躑躑躑。
躑躑將何為？念彼東山麓。
澗壑生白雲，岡巒蔭修木。
飛泉落絕壁，礫然寫哀玉。
山水有至音，安用徵絲竹？
長揖陌上人，去來從所欲。

東出長安門，倚馬息道周。
上有百年木，下有萬古流。
華

軒馳廣陌冠蓋如雲浮去者日以遠來者日以道朱顏
入朝市皓首將安求應侯朝上書蔡澤暮西游榮枯在
俯仰譬海浮水漚所以赤松徒屣脫萬戶侯

陟彼高臺上天風吹我裳顧見雙黃鵠浩浩摩空翔振
翮翳若木矯翅凌扶桑羽翼豈不修其如天路長橫絕
薄四海中道以徬徨如何燕雀羣追逐令人傷

吾慕漢陰叟灌園聊避世搢搢自行汲不肯生機事掉
首謝聖儒比之為技係混沌雖假修厥言良有味世人

徒營營心勞自憔悴

三年雕一葉為日已蹉跎木鷲徒跼跼不能出網羅天
巧固已鑿於世亦何加大圓惟混混萬木生條柯工者
力常少拙者力常多操斤代大匠傷手將如何

登彼薊門道東望漁陽城漁陽秋草落萬里陰雲生鳴
笳彌曠野虜騎何縱橫羽書東西馳刁斗日夜鳴一戰
左賢遁再戰谷蠡驚白骨蔽榛莽落日空原平成功苟
如此安得有吞聲

十五弄柔翰操業游藝林縱志有遐覽頗見千古心委
質事明主歲月忽已深懷思敢不報所愧在浮沉悲歌
覽青鏡長恐華髮侵大塊陶萬籟纖巨固殊音微尚在
虛恬經世非所任俛仰感白日嘯咤誰能禁

家本東海裔樵牧東山下先子秉儒術歌音追大雅一
吏稍浮沉舉世無知者眇予秉薄祜宛洛隨車馬丘隴
日以遙松栢在原野風木無停音雨露淒其灑一為皋
魚嘆零涕緣纓瀉

昔我珠樹林，熒熒照瓊島。子仲工文詞，奇氣何夭矯。如
何時不遇，歲宴空山道。卞玉苟不開，誰知為世寶。傷彼
蕙與蘭，含芳揚綠藻。嚴霜被空谷，將欲同秋草。用大世
所難，咄嗟令人老。

習習澤中鳥，斑斑五采質。天寒游石梁，十步不得食。一
朝棲靈囿，羽翰生顏色。餐君玉山禾，飲君丹霞液。道旁
有寒士，感之長太息。拂拭豈不懷，人養非所適。願因晨
風發，振我凌空翼。

大鵬運溟海舉翮觸四隅鷦鷯巢一枝棲息常有餘適
志無小大窺化有盈虛昔日五侯里狐兔嗥其墟君平
卜百錢常有終歲儲老氏戒止足千古銘盤盂

櫟社有大樹輪囷以樛欂下枝蔽牛馬上榦干青雲匠
伯睨不顧終古絕斧斤翡翠巢南海何嘗慕世氛金丸
落珍木惟以羽毛文膏火為誰銷蘭香徒自焚多材實
身累沉冥與道羣

六籍既已遠揚馬不可作鉛刀為湛盧腊鼠稱周璞偉

哉二三子將操郢匠鑿胡為崇亢厲亦復呈丹腹裂吻
御寒葢飄惟奏清角信美非大觀矩裁焉所托雅道和
且平治音安以樂不悲而噓唏皇風無乃薄

黃帝遊赤水象罔得玄珠遇道皆如此安用圖與書奈
何江左流所味在清虛六籍皆糟粕三墳為土苴得魚
可忘筌無筌焉取魚譬人適莽浪倏倏將奚如悲哉道
喪世一嘆徒愁予

古意十二首

新知且莫歡生離且莫悲憂來無定端愁思當語誰
夙昔同衾裯中心悵有違何況萬餘里欲以見容輝
君行忽已久歲月不相守浮雲蔽中天涼風吹戶牖
憂來不可宣浩嘆成疾首黽勉加餐食素心良不負

春夜一何永置酒臨高堂賓從列四座廣樂奏東廂
清歌激流羽琴瑟悲且良高張發促柱哀音不可詳
沈吟欲何待酌醴不盈觴人生天地間辟彼隙駒光
世路豈不懷坎壈多所傷乘時慎自保為歡殊未央

名都開大道上有三重樓桂樹羅櫺牖飛泉鳴道周盈
盈樓上女新粧麗且修當戶彈鳴琴皓齒發清謳一彈
幽蘭生再彈白雪流游子在萬里邈焉無匹儔忽忽歲
云晏不知春與秋音稀和者寡顧念徒懷憂游目送飛
鴻淚下不可收

漫漫秋夜長四壁涼風烈空庭流熠燿高樹號鷓鴣仰
視玉繩垂衆星爛成列志士多悲心憂來不可絕俯仰
念昔遊流睇雙龍闕同時有舊好高舉翔寥泬昔為雷

與陳今為秦與越永懷平生心風塵非所閱麾手謝故人長當從此決

迢迢百尺樓下俯長安道上有狹邪人玉顏一何姣當戶理琴歌沉漢悲清曉本以倚門姿委心結宴好良人逝不歸憂傷難獨老顧匪姬與姜悠悠亦何保

湛湛江湘吐蕭蕭芳樹林褰華思有贈馨香盈我襟美人渺千里欲致無依因江寒風已厲曠望愁人心且復置懷袖聊以襲錦衾

瞻彼泰山岑厥有孤生竹冉冉捎雲霓亭亭上巖谷淒淒歲欲寒盈盈華色綠涼風振層阿音響如哀玉高節抱貞心可折不可曲顧見女蘿枝綢繆附喬木天霜降巖威零落成樸散所以君子心邈然自結束

我行秋江曲覩彼蕙與蘭紫莖發綠葉秀色若可餐芳馨隨風轉郁烈不能干采采不盈掬思以遺所歡所歡在天杪道路阻且難棄置委空谷將隨百卉殘佩幃豈不充無乃蒨與菅蘭芳非有待所佩誠足嘆

驅車東城道言陟崇山阿茫茫顧四野萬木更條柯薄
雲出巖岫綠水生微波四時更代謝寒暑遞相過日月
化顏容華髮亦已多修名苦不早秉燭嗟蹉跎覽鏡念
平生浩嘆將如何

暮秋多悲風玄霜凝大澤駕言出行遊遊彼重城北道
旁何代丘鬱鬱松與栢上有千里塗下有萬古宅不知
王與侯狐兔多遺跡人生匪金石地上長如客新故遞
相尋神巧不能測傷彼道旁子矯性何迫隘寵利既內

營榮名多外飾交戰汨來和鬢髮日夜白胡不放情志
逍遙以永夕

猗頓慕營殖日夜謀錢刀大貴多所傷空令意氣豪鼎
鼎百年內辟海流風濤憂煎伐天性此生無已勞所以
古達士四海捐鴻毛安能為物役長使心忉忉仙人羨
門子邈矣非吾曹

涼風戒秋節歲事聿已暮蟋蟀吟前除玄雁號空度委
心懷所思邈望關山路卒歲念無衣為織機中素沉憂

結夢魂嫵婉如相遇離合在須臾撫枕不知處良晤不
可追佳期多所誤引領望明月悲啼知天曙

館課初入翰林自述

初日照高樹內苑歸新涼苑中有芳桂清芬聞我堂連
雲步七閣綠簡何焜煌蟲書錯綺繡絢帙紛琳琅對此
倚長嘆置卷發慨慷念本榆枋翼早弄瓊琚章迴心托
千古大雅規翱翔熙哉覲皇聖文化浹埏荒眷言闢九
畹樹此椒蘭芳茱萸嘉植偃蹇充其傍離離豈不玩

所需紉幃囊素修苟不植何以答虞黃大猷渺玄漠抽
緒開微茫先民有高矩祇奉思皇皇願將襪線微裁君
雲錦棠願以徑寸輝垂君珎與璜良時不可失榮名不
可忘勉哉惜居諸皇圖鞏未央

館課代此日不再得

秋夜一何永北斗橫西樓客子不能寐攬衣起行遊俯
視清水波到海無停流仰觀明月光四五忽如鉤驚風
飄白駒歲事聿已邁夸夫逐榮寵日夜將焉求志士營

世業常懷千歲憂，鷦鷯搶榆枋，鴻鵠摩天游，托心各有
謂，誰能識所由。大禹古賢聖，寸陰矢遠謀，千載諒吾師，
努力追芳猶不然。日月邁，老大將安尤，慎旃懷令圖，勿
為達士羞。

館課代迢迢牽牛星

漫漫銀漢流，耿耿橫天路，盈盈河畔女，燦燦臨長渡。輒
輒弄金梭，颯颯鳴如訴，展轉不成章，躑躅倚誰顧。睨彼
牽牛星，負輓何遲暮，舊歡諒已陳，新約期難遇。脈脈恨

河梁悠悠不得度攬佩坐徘徊涕泗紛交驚

館課雪夜講莊義

寒風吹朔雪霏霏日云暮廣庭列瑤階空林挺瓊樹有
偉高堂上宗工陳渠度振衣侍絳帷懸河啓諄諭大道
既具陳玄史亦紛驚載闌南華篇探彼環中趣卓哉漆
園吏齊論歸逍遙徐光宇天府泰宇懸高標乘元御六
氣九萬恣扶搖解牛悵四顧夢蝶紛飄颻大知一萬物
衆籟空調刁太息至人遠夢覺何寥寥墟帖與彭祖物

化競一朝指馬得真詮心鬪聿云消歸去夜未艾三尺
方漣漣噓嗒不得寐隱几坐蕭條

閣試抵壁捐珠

趙氏有良璧連城不可索抱之會滬池鼓瑟聲何迫魏
侯得明珠徑寸餘光澤照彼麟麟車不阻函關輒哲王
固有貴所貴非瑰奇請觀垂裳后帝則昭良規四表諒
已格列辟咸師師猶悖玩物儆惕若興遐思聘聘結綠
珍丸石投空谷輝輝明月光湮潭委魚目豈不懷至寶

懷寶傾天祿宮中徑寸珠可易千人粟
宮中盈尺璧可築千家屋
珠饑不可食母自朽民腹玉寒不可衣
無袴歌聲感所以唐虞理光華燭海隅
澹然寶無為茅茨坐穆穆

館課觀蘭亭修禊圖

嘉辰屬元已遲晷流芳年邈思東堂會
遐想華林篇忽披曲水圖幅素渺綿連
茂林蔚翠嶺華薄被芳田紫鷺翔且嬉
丹英婉欲然斐雲陰修竹飛觀開瓊筵
澄澄綠

水波縈曲流其前游娛有嘉客冠服何翩翩朱軒解蘭
臯羅坐臨迴川金卮乘波進素俎激流還或沉翠綸沒
比目驚重淵或攬綠藻柯擊擢浮青蓮緩帶既覆爵或
藉百卉眠亦或扼素腕握管揮雲箋中懷多忼慨意態
何踈蹢將無瑤池侶夕飲崑崙天亦云山陰會祓禊徵
羣賢風流迥千古遺想托雲烟至今蘭亭下曲水流潺
潺

代作白頭吟

此唐體也
不列樂府

蔚彼高樹林上有雙鳴禽請君罷歡宴聽妾白頭吟
兒時同里居追逐亭臺下妾弄青絲繩郎騎碧竹馬十六
始嫁君花靨垂兩鬟宛轉郎左右何時不可憐妾意尚
疑新郎心忽已舊不是故情疎自是新恩厚玉臺對明
鏡紅顏未應老炎天棄團扇涼風何太早君如雲中雁
妾如枝上花雁飛自有處花落向誰家戚戚復戚戚世
事不可必但恨識君初兩心望如一含情欲誰語攬涕
背人流君心如明月不照妾心愁道逢故家人寄書予

父母嫁女事貴人不如田家婦田家雖苦辛白頭長相守

晉陽男子行

隆慶己巳太原丈夫化為女子歌以識之

太原有男子壯烈世所無身長九尺餘白皙好眉須自負良家子募作材官徒腰中轆轤劍橫擊當路衢并州惡少年見之伏且趨一朝覽青鏡佗條空堂隅三日不出戶忽然見彼姝綽綽夫容顏盈盈玉雪膚蛾眉娟且長高髻墮馬梳脫我金鎖甲繫我繡羅襦掛我白貂帽

珥我明月珠委心懷嬾婉不惜健兒軀昔為雲中鵠今
為水上鳬昔者一何厲常關十石弧今者何柔曼巧笑
傾城都仰視浮雲馳變化不須爽茫茫窺元運玄黃無
乃渝世人但云好不必稱丈夫

寄趙少虛先生四首

空谷有佳人素質明秋霜凌風拾翠羽皎皎雙明璫負
薪日慘慙怨此江路長紅顏委中野三嘆以徬徨傾城
難可再一顧何茫茫念此不得寐嘯咤令心傷

岱宗海上來西蹴千峯倒虎岫何崔嵬倬彼空城道下有嘯歌客翛然澹懷抱十年不下堂腐心著玄草藻翰縱橫流百家如電掃如何眇良覲落落荒山老青葱松柏顏敷華不在早君其愛景光修名以為寶

親交匪一日先子同衣裯渺質亦何知忘年接勝遊別君殊未久忽復成三秋歲月何其迅道路阻且周尺素遠方來慰我心煩憂一讀再三嘆躑躅履下重樓玄霜彌大野神物蟠深湫我心匪不念悵悵無輕舟

青鳥雲中翔遺我尺錦翰卷中有新賦麗若金琅玕華藻耀朝日悲嘯曾雲端俯身眎陳宋昂首接建安大雅久寥廓文章忽欲殫夫子馳高駕啾啾鳴玉鑾舉世徒徊徨焉知若所觀景行不可得寤寐坐長嘆

夜發楊柳青望天津海口

夕泊大隄口雨氣侵肌骨舟子不得停鳴榔中夜發聞道海門近驚栗不敢越漁燈隱遙浦簫鼓聲未歇人語烟中村舟橫沙上月岸接遠流平樹入回波沒不覩潮

漲奇安知溟渤濶喔喔天鷄鳴東望蒼烟裂霞生赤城
嶠日出扶桑窟朧朧五雲裏欲吐金銀闕鐘鼓羅宮廷
百辟修朝謁整衣顧我僕神情坐超忽

送朱可大南還三首

驅車漁陽坂四野何蒼蒼我友駕言邁去去天一方踟
躕一斗酒相送渡河梁豈無絃歌曲可以佐盃觴仰視
浮雲馳蒼白忽相望黃鵠一為別悲鳴聲正長何況同
心子當為參與商人生如浮梗良會安可常俛仰感平

生豈不結中腸願為雙飛翼送子以翱翔

相思鬱以紆我懷多苦辛辛將何道念此平生親總
角從君遊奄忽二十春歲月一何迫白日如飈塵恩深
不可報情至日以新兩心托金石何乃慕雷陳風波一
相失怨彼江路津日長苦道遠繾綣竟不申豈無里巷
遊邈若胡與秦久要苟不替燕越如比隣何必岐路側
空為兒女仁

步出燕東門海月聿已曉班馬蕭蕭鳴流焱來遠道江

湖深且長南望令人老感彼荆卿徒烈風世所少懷恩
不返顧長虹日中綽平原三千士風期一旦掃咄嗟世
上兒論交何草草願持歲寒心皓首長相保

東海有貞婦為馮太安人賦

東海有貞婦烈志青雲齊本家遼水上遠嫁海門西夫
君璫璣器射策黃金墀伯氏籍天府兩叔印纍纍何意
蒼梧雲飄飄不復返日落湘水深淚向南天遠程嬰存
趙祀磊磊萬古聲徒死亦何為雪涕出瑤京故家千里

道鬱悵令人老不作逐風萍寧為負霜草秋閨素機冷
露夜青燈微生兒不識父泣盡負兒衣雪中千仞松歲
事聿已寒其下無俗植所植桂與蘭蘭苔何青青桂華
自成樹上有一翠鳥飛向天門去陳書叫九關一讀一
潺湲此事不可道酸辛感聖顏錦函天上來吹落五雲
表蛻衣何鮮澤鳳吹轉綿邈兒跪長歎息願母加餐食
日月有虧盈榮名不可極

送太常賈卿冊封親藩

北斗掛城闕河漢東南流我友悵明發駕言遠行遊王
節耀橫軛黃金飾馬頭悠悠涉河濟去去登舊丘前驅
二千石逢迎王與侯念子何當返寒暑聿云周河梁臨
往路顧念令人憂有酒不滿觴為我且復留匪無陌上
交其如道不謀眷言在同志何以喻綢繆

書吳門韓封君友蘭卷二首

南國有逸叟蜚遁吳山阿畏榮避軒冕韜景耽雲蘿誰
結同心契攬此秋蘭柯契合在空谷紉佩交如何月出

鼓鳴琴一奏郢人歌彼美握香子南陔詠方多

蘭苔何猗猗結根在秋坂皓露夕以零靡逆風自遠幽
人秉冲尚睠言樹九畹匪資服媚榮將以華歲晚生不
當門戶餘香流茂苑鬱彼背堂護相對方婉婉持此永
年壽願言加餐飯

春日過李宛平于美

春風歷皇邑宮草萋其綠良辰感客心行遊北城曲有
美懷紓人卧閣方避俗開尊華軒夕延我酌醺醪散帙

有餘覽瑩情無近矚縱橫今古談日宴未云足嘉會匪
有期深衷一何篤睠茲一笑歡宿心諧所欲相彼雙闕
間塗軌多局促道旁磬折子胡為自結束蘭香匪為人
鵲白不日浴冷然物外賞願言偕芳躅

書楚劉封君鄉賢卷

昔有灌園者忘機不忘力邈彼鹿門人躬耕不可即此
風一以渺韋素多雕飾皇皇頌仰謀日夜靡知息何哉
楚江父身隱名獨植入敦仁孝模出為里閭式不惜千

金裝而將一諾亟中堂樹蘭桂芳颺聞四域生不學宮
遊沒從學宮食諸生奉卮豆長吏匡且敕貴賤等隙塵
尸祝無終極同時圭紱兒名氏誰復識

送朱金庭李棠軒二太史奉使冊封

聖朝睦藩服策命臨侯王近臣發皇邑于役天一方行
行日以迫相送上河梁清設戾中野班馬鳴路旁遠望
長風起夕雨下沾裳樂飲未及酬僕御已嚴裝征人懷
遠路遊子望故鄉停舟問滄海驅馬過涇陽君如雙黃

鵠各自東西翔我如晨明月望彼參與商托交固金石
別促會當長願言整夙駕覽風陳國章

送于子冲上澤州太守二首

涼秋聿云暮烈風飄人衣念子遠行邁整駕出郊畿
徬徨以中夜起視明星微出祖城南隅握手不能歸
孤鴻號中野木葉縱橫飛聚散一如此素心亦已違
惟有雙魚札慰我長渴饑

古者不可作交道久茫茫念我二三子總角共翔翔
歡

束如日月別思苦參商五馬向路馳俛仰情內傷問子
今何適驅車陟太行曲坂造雲日谿谷深且長人情多
嶮巖世路固難量勉哉懷令德叱馭有遺芳

送趙潑陽殿讀上廣東憲副

凜凜歲事寒重雲蔽城闕游子欲何之驅車適南越南
越萬餘里江深安可涉鷲墮五溪雲猿號修嶺月耿耿
烈士顏世路無工拙况握黃金章名在諸侯列我皇眷
邇臣賜環不賜玦惟是同心人歡情中道缺踟躕在廣

路恨恨不能訣砥如水中石皎如山上雪直道諒已難
憂心未云掇吾將從此辭長歌棲林樾

題雲間林諫議重壽卷

雲間有逸叟德聲穆若蘭緬昔諧良覲登堂揖鵬冠肌
膚瑩玉雲兩頰渥如丹大飲呼五白清夜不知闌一往
謝朝市戢景吳江湍涉海掇瑤草臨流倚翠竿借問此
何為言奉北堂歡北堂有壽母百歲以盤桓晨羞沆瀣
滓夕進雕胡盤老人為兒啼七十戲堂端殊事聞遠近

眇然使我嘆魚翼不可並純祐世所難况復青雲客為
時麟與鸞兩世有寵命服之吉且安飄飄千餘歲娛樂
未云殫

雜詩八首

蔚彼蒿下田中有雙黃爵五步逢一飲十步逢一啄仰
見鴻鵠遊六翮翔寥廓豈不願從之道遠將安托天寒
多野風四面張罩絡蘇合作彈丸歷歷空中落鼎俎苟
不干蒿下亦已樂

陟彼高臺上四顧臨郊畿下有清冷水寒流日夜微何
來孤鳴鴈嘯匹空中飛天風一以厲烈烈吹毛衣稻粱
既不慕葭茨亦已稀茫茫在中野日暮將安歸我欲負
爾去惜哉羽翼違長吟望雲漢祇使心勞悲

巫山不為高湘水不為深結交寧在廣所貴相知心朝
雲既晦靄暮雨復淅淫頃刻更變化安知陽與陰交情
苟如此世軌良嶮嶽將邀美門子天路相追尋

北登遼陽城顧望三韓道大海何蕭條白骨橫野草下

充蛟魚食上使烏鳶飽傷哉十萬師大半塗肝腦粟米
量如沙金帛積成島功名誠可為封疆在自保閉關謝
遠人良圖胡不考

所思在何許在彼沅與湘何以問遺之解此雙明璫葺
蘭結菌桂室宇何芬香佳人殊不至望望天南方烟波
弄白日容與凌風翔江空歲云晏零露成朝霜不忍棄
所寶且復自徬徨端居有餘翫思遠徒勞傷

延陵有長劍寶若千金璧閉匣泣風雨開匣干星日駿


馬與名都羅列終不易服之適異土見謂鉛刀質徐君
亦何為神襟獨爾識欲色在不言心許成莫逆如何歷
聘歸墓門已有棘含意竟未伸涕下空沾臆宰木集晨
風可以懸三尺寸心苟不渝是物何足惜驅馬去郊原
棄置如遺迹賢哉貴公子交情固金石咄彼市門徒景
行宜自惕

名都有士女居在城南端前庭樹桐梓後閣羅苔蘭齊
紈為上襦魯縞為中單援琴理清曲惠聲穆且閒惜哉

歲不與憔悴空江流芳華一以謝烈心不可干蹇修為
誰使遺我雙瑜環朱衣從千騎寧可一為歎聞此竊自
嘆立身誠獨難貴亦各有慕賤亦各有安豈伊霜雪質
能晞桃李顏歛襟謝媒氏自下重門關

神龍時未遇蠖畧蟠深淵不有浮雲藉何由潤八埏鷗
鵬隨海運一徙陰重玄扶搖非有負羽翮安能旋遠臣
必有主通臣必有先商君因景監五羖介穆賢內資富
強業外秉侯王權功名豈不偉烈士無稱焉行藏制在

已升沉制在天寸尺既可枉尋丈寧無愆所以魯連子
抗志青冥間隻矢三軍解單辭六國全萬鍾苟不欲展
脫如浮烟諒哉天下士疇克與比肩



穀城山館集卷二

欽定四庫全書

集部

穀城山館集卷四

詳校官中書_臣沈鳳輝

侍讀_臣孫球覆勘

總校官中書_臣朱 鈐

校對官中書_臣潘奕雋

謄錄監生_臣陳大初

欽定四庫全書

穀城山館集卷三

明 于慎行 撰

五言古詩

飲鮑莊泉石淙

在泗水縣東

行歌涉沂酒暫偕魚鳥歡
碧草夾修逵炎風吹我冠
道旁有嘉樹四月秋聲寒
俯見石淙水突出成潺湲
清虛涵雲日滴瀝鏘瑤環
主人有逸興為我陳盃盤
解衣坐

魚筍揮手截素湍瑩徹青玉鏡照我顏色丹泠泠漱瓊
液飛沫盡可餐祓洛未為盛臨濠愜所觀遲暉速短炬
走海無停瀾能將雙蓬鬢逐彼兩跳丸長謠望前路於
此且盤桓

石竇泉

異哉石竇泉此竅何年鑿湓流鳴地底砢岩成大壑駭
浪懸且騰驚湍飛復薄歛如玉壺倒覆似春雷躍片片
廣陵濤洒作霜天鶴增澆旋石瀨猗靡龍鱗絡渥汨入

回淵欲去復疑卻孟公酷好奇取瓢承漬瀑我亦一俯
首悽然心魄愕四月衣袂寒共謂秋霜落嗟哉造化工
於此固索齋

從泗上歸宿杜太學莊舍

暮從川上來兩袂涵清輝回首睇泉皋蒼茫紫烟飛相
挈入村舍解鞍控板扉牛羊深巷入雞犬空牆依中庭
有花樹鬱鬱何歲隄山月在簾牖星河亦已稀宛然林
壑姿顧視朝市非主人有旨酒行吟聊共揮避世豈在

遠此中可忘歸

登嶧山絕頂有懷賈大卿石葵

茲山一何高岱宗青未極峻削玉芙蓉去天不盈尺我
來嘯良偶杖策探奇跡窈窕尋幽壑嶇嶇捫絕壁俛首
瞰虹霓四望寥天一重陰萬里生遊目忽不懌睇彼東
南陬山川含奧邑滄浪如衣帶半掛青巖色中有素心
人寤歌方宴息欲往一相覲其如修路隔據彼孤桐枝
臨此萬仞石願因天風吹達我心相憶曲終絃欲絕撫

琴長嘆息

曝經石

泰山
下址

朝下天門關夕憩曝經石此石自何年斜倚萬仞壁疊
嶂灑飛泉匹練百餘尺水底玉篆分了然成鳥跡其文
乃上古讀之茫不識誰參雪竇禪永示金仙跡淥池低
寶樹宛見祥河出兀坐聽潮音洗耳心方寂

送范涵虛太史入閩

臥病謝人徒塊焉處寥廓客從何方來緘書投我索開

絨見故人我心忽不樂問子今何適行行入甌駱甌駱
日南陬思客春梅落冉冉江中雲迢迢海上郭太息念
我曹十載依銅爵云胡乖羽翮南北成離索驚飈拂林
樹洪流奔大壑鳳棲無靜柯龍游安所托聞君有良劔
舊在豐城鑿佩之入山海不能逢不若寶此千金質百
鍊焉能鏤今我方無為草玄惟寂寞

寄張洪陽殿讀豫章四首

月出何皎皎照我堂南端愁人苦難夜躑躅起長嘆長

嘆將何思念我平生歡江湖萬餘里道路阻且難孤鴈
過我庭悲鳴風正寒願傳尺素書報爾青琅玕書成在
懷袖涕下不能看

昔我從良友翩然遊帝傍有如雙黃鵠厲翮起高翔風
波一相失天路何阻長三秋為一日噉噉遙相望周周
嘯嘯匹銜羽正徬徨麋鹿索其羣孤號在莽蒼咄咄久
沉吟為君心內傷

海上有浮雲鬱鬱雙龍闕何意回飈吹翳此瑤臺月風

雨忽冥冥九關不可謁直木忌為材甘井常先竭人生
百年內鼎鼎何超忽日月跳兩丸誰鍊黃金骨富貴亦
何為芳華有時歇寄聲問所欽好食山中蕨

王陽方結綬貢禹亦彈冠虞卿為其友解印去邯鄲千
金重然諾百折不辭艱窮達相與俱飛沈豈異端末世
逐榮寵斯道亦已難裊彼女蘿枝纏綿誠可嘆君為千
尺松我為一握蘭蘭松不相結惟以共歲寒

寄習豫南太史閩中二首

颯颯雙鳴鶴集彼玉樹林凌風振逸響各有九霄心如
何平羽翼形影互飛沈君滯炎海上我棲梁父陰佇立
望川梁江路迴且深豈無一札書飛鳥不懷音睠彼越
鄉嘆感此年歲侵一為同心謠涕下霑衣襟

日夕登高臺悠悠望南海南海不可從萬里陰雲靄念
我同心人畱滯方何在一出咸陽門歲事數已改眇眇
睇空江粲粲生蘭茝日晏江水寒美人殊不采如何桃
李顏含笑揚光彩保爾歲寒心芳華自掩靄

送田鍾台宮諭視篆南都二首

東風入上闌，衆草靡靡綠。
有客遠行遊，倚舟河水曲。
河水深且長，帆檣千里矚。
金陵佳麗都，洵美多舊俗。
石渠對圖史，吏隱諧所欲。
奈何卑棲子，風塵獨躑躅。
緣木諒難工，積薪空自束。
極眺遠行雲，願作雙黃鵠。

別日一何久，會日一何難。
浮雲滿天地，遊子路間關。
為君置斗酒，四座慘無歡。
仰視明星輝，俯觀溝水瀾。
聚散諒無準，浮沈寧足嘆。
少年多意氣，碌碌非所安。
願敦久

要誼相期以歲寒

夏日邀朱令君飲楮村石淙

山公在襄陽日醉習池月歌聲起銅鞮至今名未歇我
侯有仙標邈與世人絕抱琴出邑郭來采石淙巖石淙
何潺湲流水歆玉屑蕭颯洞壑鳴五月寒人骨方塘一
片石混沌本無缺自從庖羲來畫作赤文裂遠望峽水
流猶似天山雪此中有真賞欲語不可說掃苔臥石坪
山月歸可挈

七月十五夜同朱令君吳文學汎舟北溪

抱病臥江海屢經故國秋閉門覽羣動自得靜者謀
仙宰有逸興強我北渚游時值七月望寒蟬叫新秋槐柳
夾修岸山鳥鳴啁啾寒帷望孤嶼迴橈背古丘歌聲上
雲漢玉管吹汀洲須臾綠烟滅好月尊前浮皎如瑤臺
鏡瀉作金波流仙人垂素足桂樹枝相樛掃石布瑤簞
弄水驚素鷗風飄寒梧響露下莎雞愁清景不可奈中
夜仍淹留歸路悵明發此歡焉可求

登華不注絕頂

齊都多名山茲山獨邈絕中峰帶湖水華頂留寒雪一枝玉芙蓉翠黛若可掇我来凌青冥倚嘯紫雲裂嵐氣互氤氲波光半明滅平野碧烟浮長隄春樹沒流覽望扶桑欲見蓬萊闕雲間逢真人舉手問寶訣泠然紫芝想了與紅塵別佳游難再得夢想何可輟

泉上

偶坐泉上石暫與人境隔天光涵清虛水木有佳色心

對游魚閒目送孤雲白涼颼山際生微雨天欲夕

送楊廬山戶部左遷淮陽

華月出高牖新焱激廣軒斗酒酌良夜君懷胡不歡昔
藝名城樹今握畫省蘭作吏既彊項為郎亦苦顏如何
流雲景奄忽無定端言從淮海至又客淮海暝摻袂即
往路永嘯涕汎瀾騶驥志千里松柏厲歲寒壯心苟不
渝坎壈亦何嘆去矣崇令圖久要慎莫譖

壽四明沈封君九十

林類不知隱行吟聊帶索伏生老嗜經於道為糟粕何
如海上閭三老同賜爵上老冰雪肌下老顏如渥中老
正敷愉九十骨矍鑠釋智絕町畦縱心遊恬漠有子漢
列卿名在石渠閣洗沐一來歸六傳謹城郭玉笈綠綈
封寶駟黃金絡華旂既綏綏綏綏何若若上堂問起居
跪進丹丘藥羣從歛相從翩如鸞與鶴仙氣結雲霞君
恩散林壑翁其愛玉體延年千歲樂

題王母圖壽新建張太夫人

西山一何高上有列仙館阿母幾何年矐然霜髮短丹
室構瓊英霞衣出火漦上元受寶訣雙成吸玉管俯視
瑤水波幾度清且淺青鳥雲中遨飛鳴正覲睨玉函墮
真圖仙氣人間滿侍中歲星魂燕喜何衍衍取彼玃琪
實跪進車渠盃若木曉暉長桃花春氣緩一奏玄雲謠
永歡閨風苑

哭弟三首

嚴霜下前除朔風淒以烈今夕復何夕同生成永別疾

疾能幾時音容忽已滅稚子號中閨阿母啼成血有兄
滯天隅之死不及訣仰視雲間鴻呼羣中斷絕俯觀庭
中樹瓊枝已再折永嘯涕如雨沈憂鬢成雪豈不懷大
觀至情疇能掇

天地有大運物化莽茫茫螭蛄一何促彭聃一何長摧
心嘆吾弟茂齡成殀傷明珠沉碧海神劍蝕精光念子
平生日沈痛結中腸俎几設虛奠旨酒盈素觴魂兮無
不適當復來我旁屏營望南阜攬涕下沾裳

昔我過里門訣爾衢路側搥袂對賓友悲風聲正迫猶
言生離苦知作窮泉隔含意恨未伸生死各脉脉睠懷
握手地心折秋山陌人生一世間忽如逆旅客誰能以
遽廬噉噉號真宅三復桑戶吟一哀聊自釋

擬門有萬里客行送胡孝廉孟弢孟弢為其先
君求志遠走長安云

門有萬里客攝衣造我堂風塵著眉目車馬倚道傍問
子今何為執手涕沾裳自隱匡山隅承歡樂且康三復

南陔詠旋廢蓼莪章飲捲悲鳴木陟岵悽嚴霜日月既
不處遺德亦未忘幽蘭委澗沚無風誰為揚願子片石
書永我寸草腸以茲冒炎暑屣屣涉江湘我聞再三嘆
俛仰以徬徨亦有明發懷感此中情傷念君苦行役且
復盡一觴修詞諒非任其敢沫餘芳君懷雙虹劍耿耿
明星光一當萬乘主為寶誠難量如何慕臯魚空為孺
子愴歸其保玉體天路以翱翔

題張中丞傳野萬玉山房卷

吾慕竹溪逸愛此竹樹林悠然展幅素綠玉何蕭森萬
竿挺寒翠千畝橫素陰亦有高節士結廬江水潯夾池
亂橘柚拂檻鏘球琳詎開蔣詡徑但撫山公琴竭來仙
省遊雙管耀華簪截彼虬龍籀寫茲驚驚音無為睠荆
渚寤宿增遐心此君在几席可以澹塵襟念本孤生植
冉冉泰山岑願為琅玕贈徙倚一長吟

送王宮庶師竹請告南旋

凜凜歲云晏雨雪彌中林念子即往路河梁阻且深廿

年事明主謂比雙南金國恩豈不懷胡然有遠心東臯
解懸耜中谷發鳴琴松蘿夾戶牖山水流玉音何如長
安遊輿馬日駸駸素衣一以染華髮又欲侵蹇予魯狂
生于今亦越吟送爾結長想極目青山岑

貞婦吟為長安潘氏母賦

中庭何所有藝彼竹與蘭竹蘭被戶牖玉樹羅堂端天
風西北吹衆香越以繁借問此何居言之辛且酸本家
東海上羈旅在長安良人早見背遺嬰亦已單秉心在

冰蘖誰能惜盛顏楊枝耀春華栢枝凌歲寒豈無青陽
輝良非我所觀補衣為兒襦輟食為兒餐兒從長者遊
斷髮佐兒歡以此持門戶幸不墮衣冠我聞慕且悲此
義世所難共姜名不沫文母節未殫試為貞婦吟一倡
再三嘆

上外舅秦翁生辰

近親同里門遠親異鄉邑何況舅甥歡津梁千里隔宿
昔忝乘龍門闌在咫尺阿翁豪且賢雅稱閭右室遲暮

無它男所托惟女息廿年隨宦遊庭階亦寥寂中歲鞠
兩雛恩勤瘁心力女兒在襁褓男兒操紙筆翁媼歲時
來撫摩均自出伊予久懷歸蹉跎年歲逼惻愴骨肉情
含辛念非一兩雛忽相牽長跪繞我膝屈茲中元秋阿
翁弧矢日賓從列中堂孟觴行絡繹兒母在天隅間闊
增煩悵請耶蓂片詞寄我離孫臆我聞兩雛言吟嘆心
戚戚孩抱亦何知母慈良可識翁今七十三媼亦過七
十丹顏未全改續髮但稍白矯矯矍鑠姿少壯或不及

海桑千仞枝池桃千歲實鬱鬱岱山松纍纍丈人石持
此壽翁媪永列丹臺籍時和復年豐娛樂加餐食早晚
歸山樊聚首多夷憚揮翰為長歌歌闋情未極

冬夜方胥成過訪

玄雲結重陰北風淒且寒端居寡言宴惜此芳歲闌客
從遠方來入門正其冠解裝出所有贈我青琅玕其物
有光耀握之感且嘆華銓列堂隅酌醴羞盤餐片言意
氣合昵若平生驩風雅久淪替學海多狂瀾衆目徒熒

焚誰為曠古觀問君四方志前路何漫漫時俗賤文史
世事多艱難勉哉樹芳軌榮名不可殫

春日寄陳從訓

上日臨高臺平隄草已綠感物動我思騁望春江曲春
江不可涉幽人在空谷葺彼桂蘭宇好此蘿薜服舒嘯
穆鸞凰結佩鏘瓊玉居依戴顓宅遊踵焦君躅豈無席
上珍風塵匪所欲一為傾盖言相期違世俗十年曠良
覲念子心煩促寤寐豈不諧綿道如川陸悠悠河上魚

渺渺雲中鵠，緬懷一札書。徒勤萬里目，眷言崇令加。
餐以為祝。

題崔仲素郡丞撫松亭

藐彼海上山，雲氣何寥廓。中有孤丘亭，蒼茫臨大壑。
約壁荃與蘭，塗材匪丹雘。亭端亦何有，長松雙落落。
下根盤虬龍，上幹棲鸞鶴。冷風無時休，秋霜被已薄。
主人北州牧，解組耽恬漠。亭中諧寤言，松下恣盤礴。
月出鼓鳴琴，永夜聲蕭索。載詠彭澤吟，古今偕至樂。
顧見泰山隅。

五株良有托萬古稱秦官貞心無乃忤請移植此亭為
假山中爵食彼偃佺倫共鍊延年藥

閒居述懷

白日御颺輪西下何其速河流東到海日夜波聲蹴人
生正百年榮華不滿目君今亦胡為沈吟長躊躇北里
有良友南隣多舊族相羊山水間聲若絲與竹斗酒可
相娛極宴適所欲何必宛洛遊裘馬相徵逐制命固在
我無為自局促

新春獨坐有念

青陽布歲和鼓籥回嘉律如何后皇心條風猶慘慄七
日不出門塊焉坐斗室咄嗟顧庭除感念端非一豈無
閤巷歡亦多朝市匹白首盡如新誰為膠與漆避世良
所欣延齡豈有術人生陶大塊飄如駒過隙苟欲役風
塵何物關名實旨哉盈觴酒優游以永日

元夕家宴示諸子姪

端居逢節序中情眇所歡常華既云瘁谷風良不完佳

夕謝賓徒且復陳盤餐升升既列侍孩抱亦團團尊酒
日云晏華鐙爛以繁九枝蘭桂燼四照玻瓈丹笑語不
知疲迢迢清夜闌永懷家門念俛仰固多端依棲幸不
遠蕃碩已可觀慎旃各努力保作誠為難

泰山對酒贈馮琢吾少宰

晨登泰山坂四顧何茫茫浮雲蔽若木旭日開扶桑陰
晴倏忽變登頓多蒼黃長風四面至烈烈吹我裳客子
駕言邁行行陟帝鄉前有一尊酒臨此萬仞岡綢繆亦

何念展轉不盡觴結交睠金石悵別懷參商高舉步萬里遊目涉四荒其雨怨杲日若濟思舟航努力事明主庶令泰道昌

靈巖送別琢吾

山館夜不寐起視明星微北斗掛楹牖天河垂欲晞客行一何遽申旦從此辭十年聊一晤此後長相思斗酒不得醉涕下沾裳衣君如山上雲作雨彌天施我如澗中石抱此不化姿浮沈各有以本自相因依寸心苟不

渝安在合與離願言保黃髮待子成功歸

寄題朱金庭宗伯逍遙樓一首

我有同聲偶宛彼天南隅十年曠色笑萬里違音書坐
逢越方人跪問今何如方修南華義閉迹重樓居重樓
何縹緲迴架名山隅星月宿雕檻虹霞帶綺疏雲門列
遙障剡水周前渠冥韜寡談讌遐眺多謳歛達哉曠士
懷自執環中樞鷓鴣棲非隘鷗鯨潤豈餘至遊苟有托
焉適非吾廬君今息溟海吾亦耽枋榆室遐人尚邇年

往意未疎恨無雙飛翼徑度三山間永言奄玄旨婆娑
以自虞

蜀山湖遊太宰吳介肅公精舍感述

渺渺汎平湖亭亭望孤嶼秋風莽蕭瑟川光澹容與昔
有素心人此焉耽宴處下帷探道帙閉關謝塵侶狎從
鷗鳥嬉遐慕鴻鵠舉國卿豈不崇視若鳶與鼠遺構今
尚存高芬疇克旅白雲去不還寒山靜無語景行不可
得迴橈徒延佇

壽周燕川封君為司理周君作

逝彼瀟湘水北流雲夢陰鍾靈孕華閱寶樹何蕭森長
公楚山玉仲甫荆南金叔君何所韞祿此席上琛力田
笑株守談經軼陸沈甫志藍田璧旋鳴單父琴政聲彌
漢沔士譽播江濤自振雙鳬羽還成五桂林名郎負奇
采天闕影華簪執法奎婁野揚芬岱嶽岑秦牘荷殊寵
陟岵勞遠心秦雲睇菴夢蜀道歌嶮嶽願言漸壽祉酌
斗思惜惜長跪再有獻所獻非球琳玄霜十洲采瑤草

三山尋服此顏如渥無使華髮侵漢水誰謂廣湘水誰謂深聊挹滄溟潤流君世澤吟

冬日得馮少宰用韞書問寄謝一首

北風一以厲雨雪何漫漫江湖莽浩淼周道阻且艱故人在千里寄我雙羅紉織成不惜遠為念衣裳單感茲平生意提挈再三嘆別離未覺久年光忽欲闌幸有裘與褐可以禦歲寒七章匪不麗所適煥且安卷衣置篋笥
笥
悵
不能
諛

題睢陽魯夫人貞壽卷

伯姬魯國女作嬪儀宋宮委身殉烈焰名與天壤終伊
誰嗣良軌請歌貞媛風淑靈稟鴻造典訓開儒宗生年
汶陽里遠嫁梁園東君子秉明誼德心協所崇瑟琴諧
雅調環琯多莊容嫵婉未及竟隕棄號蒼穹秋霜激素
質朝日明丹衷和丸佐兒誦停杼代兒春日永非在夏
宵長非在冬奄忽歲年邁拮据堂構隆永懷背堂念不
受清臺封貞如幽澗栢含翠凌高空皎如旋淵玉吐耀

千長虹母師饗嘉號女史圖芳蹤一為鳬鵠嘆感慕何時窮

慰宗侯玄同契丈居廬

端居歲云晏雨雪塗周行寒夜不得寐起坐思天方天
方有良友皎若珪與璋間者闊聞問匪謂殊津梁方修
倚廬禮自廢蓼莪章天風號林樹烏鳥鳴聲長曾閔既
人紀臯連亦國良吾邦賢聖里風軌敦侯王願言一往
慰我馬摧以黃居諸諒已迅霜露多悽愴光前固有道孺

慕徒為傷君其勉餐食錫類方未央

謝少傅蛟門沈公書問

徙倚步中庭仰見飛黃鵠黃鵠自何方遺我一尺牘開
牘見所欽慰借溫如玉為寄雙織成無非錦與縠卷書
置懷袖感嘆不能讀匪無遠道思畏此川塗曲間別十
餘年故情猶爾篤欲以報綢繆山雲不可掬天道有盈
虛人情多踣躅狐白豈不珍褐衣亦已燠苟存歲寒心
不在違所欲

題吳母貞裕卷二首

衛姜植特操鄒孟秉義方貞哉延陵母曠古嗣遺芳素
衷矢皎日烈質凝秋霜并總奉君子瑟琴靜且良一為
終天訣掩鏡銷鉛妝晨炊井牀凍夜績釭輝涼中庭長
瓊樹復汎崇蘭光璇室有形管名與星嶽長永言歌黃
鵠三嘆沾衣裳

女貞既有樹女清亦有臺不如母師號雲漢天昭回丹
泥北堂燿璇榜深閤開表閭與錫命流耀江海隈子為

簪筆史倚柱稱瓌材孫為含香吏抗章胡壯哉家聲一
以振母節益以恢正氣凜千古榮名肅九垓歌言樹令
軌以拯流風頽

瑞穀謠為郡伯劉公賦

我服汶陽隴獲彼麻與菽道逢拾穗人軒眉行鼓腹問
言何所欽吾邦有仁牧濺澤若雨暘庶徵協寒燠芄芄
萬寶登穰穰三秋熟舊聞嘉禾名今見嘉禾簇一莖二
三岐多者至五六異畝荐周塍合穎標唐錄惠露洒瓊

臯條風披廣麓上克德政符下錫氓底福不謂憔悴餘
歡聲洽比屋我聞三嘆言地寶一何渥有淵不產珠有
田不產玉固知聖后心所貴惟民穀願以魯史書仰佐
豳風祝昊貺感皇仁流膏豐海隅

題鄭雙峰先生鄉賢卷冊

谷口有逸民秉耒在巖穴儒宗遁北海牧伯欽高節二
公世所師豈伊青紫列誰者嗣流光華胄棲東越握槩
謝公車服隴耽郵畋獨行州里孚篤誼神明徹生不采

芹游沒從舍菜醢典禮曠無前清芬耿不滅神報一何
延永錫鍾遺厥亦有公衮褒金書馳象闕種木百年陰
種德百年烈末俗徒皇皇芳規胡不晰

題邵武丞鄭公名宦傳冊

古者侯與卿偃寢無遺跡桐鄉一嗇夫至今有社稷民
志諒難諧德聲允無斁邈哉邵武丞乃與千秋匹蚤耽
竹素編幕隨升斗檄十載和鳴琴鸞鳳棲枳棘折獄照
覆盆賦政懸尺籍老掛武夷冠雲臥仙巖碧猶餘棠樹陰

清風滿舊邑長吏備時烝澤宮叅脩食赤紱豈無人伊
誰分半席柳勒武功銘韓記藍田璧婁江筆如椽亦永
循良績公真不負丞是為黃綬式

紀夢二首

昔夢遊閭闔謁帝明光宮天衣馮玉几顧笑回春風眷
言苦行役賜酒盈金鍾飮芬滿襟袖色瑩玻璃空吸之
不能半已覺衰顏紅洗爵再拜謝幸免傾側容小臣升
斗器既醉心忤忤沈湎豈不愉無乃裁微躬大福諒不

再君恩既有終

夢從化人遊虞我以奇巧平地疏清渠中有萍與藻遊
魚三五頭淫裔何鮮姁良無波濤驚似有雲氣繞臨流
美且觀不知牀月皎記念在恍忽躊躇至天曉夢中幻
已滅寤言復何道

穀城山館集卷三